

保留城垣意見書

上海图书馆藏书



A541 212 0012 9117B



呈爲呈述國防見地擬懇將中國現有城垣交付國防會議或交負責機關審議以便通盤籌劃規定方案而固國防並通飭各省遵行仰祈

鑒核事竊以歐戰告終世界列強雖鑒於往者之創痕甚鉅深懼來茲之戰機復作一則曰縮減軍備僅以自衛爲度再則曰非戰公約維持永久和平然究其内幕或因雄長互爭利害時虞衝突或因城下受盟私恨終謀昭雪在在均有暴發之可能故於國防之整理更新靡不殫精竭力各思所以金湯吾圉蓋勢使然也我國自甲午庚子兩役以還不特不平等條約束縛無遺肘腋之間堂奧之內已苦隱憂四伏而人材寥落杼柚其空亦非十年教訓十年生聚不爲功環景如彼國情如此設再於國防上固有可用之點而利益復最大者不予深刻辨別力爲保存而貿然毀去之一朝告警其有緩不濟急之痛自無待龜筮矣今請以要塞立論夫要塞爲國防之一部以積極方面言之或制限敵軍之運動或掩護國軍之

集中或集結優勢兵力猛取攻勢侵入敵國擊破敵軍而以要塞支撐某方面節約兵力用於決戰方面以達作戰之目的海國則於海岸上戰略要點建築堅固要塞以使野戰軍及掃隊之作戰有利進展以消極方面言之或防遏敵之侵入或牽掣敵之運動或掩護重要資源或分散敵之兵力其爲利益指不勝屈我國以自衛爲國策以保境爲國防方針姑無論策取攻勢非所企圖然而野戰軍隊遠不如人其不能不恃要塞爲國防上必需之要素毋待論試觀往昔要塞設備不完善之國家而今莫不耗費鉅萬爭相建築其爲何事不待智者而後明矣吾人若回憶德軍之不能由法國東部進攻及凡爾登要塞之前後牽制德軍四十四師之衆并傷亡德軍五十餘萬之多終於支撐西方戰場有利全局與夫土爾其之達爾達乃爾要塞之阻英法海軍頑強抵抗終使聯軍老師糜餉深宵潰遁以及一八六六年澳軍以國境四角要塞掩護集中卜魯卑爾特

將軍利用孫甘帕克挪要塞爲運動軸率七萬之卒破意軍二十萬之衆之奇勳偉績當能想見要塞於國防上之價值而確認永久築城之爲物可以衛國可以遂行國策可以達到戰略目的可以爲戰略戰術上之支撐點與運動軸矣茲更就戰史所予吾人之教訓而言之單一要塞易於傾陷集團要塞不易攻破若再連接集團劃分數線則強韌堅固更越尋常法之梅資要塞保持七十二日比之李支要塞守護兩週間法之巴魯堡要塞一二日喪失瓊甸之下魯塞密司魯要塞一四八日開城旅順要塞一九零日失陷青島要塞三十八日淪落凡此皆單一要塞缺乏連繫一朝圍困莫不淪亡至若集團要塞地域廣闊配置鱗比互助互援以故凡爾登都爾始終未下哀皮挪爾卑爾法得久戰不摧若夫歐戰前之法國要塞分三綫配備尤爲鞏固其第一線卽國境防禦線北自英國海峽之加拉斯南至地中海岸之奈斯西自大西洋之皮訶奈東至皮爾加

德環繞比·德·瑞·意·西班牙五國國境包含五十有三名城第二線即國內防禦線對比·德·瑞·意·四國方向設置亦包含七大要塞第三線即總複廓設於首都巴黎此外在大西洋及地中海沿岸亦築設二十一個要塞之多其設備之完善配布之周詳實所罕覯故歐戰中霞飛將軍實行大規模之戰略退却防線整然德雖窮追竟爲所阻終於以巴黎要塞爲進展基地而轉移攻勢其爲貢獻亦偉大矣歐戰而後永久築城之學術尤爲精進或利用地形地物或疎開戰鬪機關或趨重要塞集團或編成築城地域或使若干防禦地帶併列或使鱗次配置或使成縱深極大之數線防禦地帶而於要隘施以永久築城各處要塞相互策應中間地區火力閉塞層層障礙節節連鎖持久戰爭堅強不拔我國若採納歐戰教訓似宜於海陸邊境及沿江各省區之城垣悉數保留則縱橫連貫運用自如隨地隨時均可以構成防禦地帶固我疆圉乃拆城之議甚囂

塵上或謂我國城垣接近市街一有戰爭市街立受波及不合要塞圍廓原則不適於砲戰不思國際戰爭慘酷難名戰事開始之前例應將所在住民後送內地市街縱相接近爲損無幾且一九一八年德以十五萬米射程之加農射擊巴黎命中一八三發其射程之長幾合吾國二百八十里實推倒一般野戰軍與要塞相距三十餘里之原則當時法國上下震驚羣議遷都避免傷害然而戰事底定初未聞巴黎複廊因而拆毀此中理由不言而喻或謂城垣過於暴露目標太顯不合築城原則不適於空中戰爭不思全國城垣未嘗盡露居庸山海隱然以深苟採長去短修改得宜必能吻合地形目標隱晦且空中戰鬪兵器攸關若防空兵器不亞於人敵國空軍又何足懼或謂中國之城垣連續成一圓圈無側防設備一部陷落則敵人一衝而入全線同時失其防禦力除少數城門有簡單之砲座設備外全城多付缺如不適於砲戰不思城垣原非死物壁壘儘

可改修若添設戰鬪機關必可增加強度且歷考國際戰爭自開始談判乃至實行交戰爲期率需半載趁此期間補構當無不及之虞故鄰接國過多之國平時戰時以要塞爲唯一支撐點者平時均不全部構成僅于重要部分完成其永久築城之工作其他各部則儲備材料隨時精研各種方式一旦國交有衝突將至破裂之時則亟亟着手完成其全部要塞之工程以此証之我國各城垣實不啻千百年來預設之大工事據點也若吾國之於假想敵國業有成算更何妨未雨綢繆補修增設想見一經改造其防禦力之增加自可預卜凡爾登要塞於戰鬥間猶力加修補終於不拔可爲明証或謂城垣若不拆毀適使梟雄有所憑藉暴徒有所據依不啻誨盜慢藏自招禍患不知任何國家如果政治不良積成亂象卽無城垣根據亦將盜弄潢池若使政教修明人心安定必且勇於公戰恥於私鬪決不操戈同室煮豆燃其況城垣爲要塞之根基原非廢物可比

不保留之以資國防之用乃以爲召禍而拆之無異因噎廢食可懼孰甚或謂城垣阻碍交通妨害市政計畫儘可多闢城門如須擴充建築亦可移於城外況城垣關係要塞要塞關係國防區區局部交通誠不足以同日語此真見秋毫不見輿薪之論也或謂城磚之售價可供教育經費及社會事業之用留之不啻閉置寶藏不合經濟原則須知一城之構築大者平均六十里約費一萬萬中者平均三十里約費六千萬小者平均十里約費二千萬我國全國約有二千餘城若以大城百座中城三百座小城千六百座計算爲費當在六百萬萬左右而拆磚賣價最多不值構築費之半除去拆運各費及其他中飽外所餘能得二百萬萬元之概數已爲幸事然無形中已虛擲四百萬萬矣且要塞必有築設之日國防終有完成之時如果舊有之城垣既拆新式要塞之築設卒難成事一旦國防緊急發生不幸彼時如有城垣勉事支撐當勝於無城萬倍其爲利益又

豈城磚售價之可能比擬破壞易建設難貪小利亂大謀當爲識者所不取再查我國城池大率依山傍水形勢天成外而雄踞邊疆內而控制要地星羅棋布脉絡相通與歐美之新式永久築城原則隱相符合此城垣之不爲過去廢物可以保留者一也各城建築雄壯城周大幾百里中數十里小亦及十里高三丈最低亦有一丈五尺厚在六丈以下一丈五尺以上其材料或係岩石或係燒磚其強度雖不及鐵筋依頓然戰時因陋就簡補築添修強度增進可以斷言此城垣之質地堅良易於改善可以保留者二也且城垣已具要塞大體並備堡壘雛形若詳審敵情相度地勢擇其可以爲集團要塞地域者將各城垣略加修改用爲集團要塞之圍廓必可功倍事半節省時此城垣之業有要塞形勢可以保留者三也我國四境強鄰環伺陸海正面處處堪虞若以國防之見地處處築設新式要塞既爲財力所不許亦爲事勢所難能則舊有之城垣儘可因時

利用彼歐洲大戰亘四年有餘爾時雖一事一物之微亦勉期爲戰爭之用而此後之戰爭因關民族之興亡爲期必漸延長則堅苦撐持冀收最後之勝利更必有賴於偉大之築城此城垣之爲既設要塞可以保留者四也中國交通梗阻集中困難若國境防禦線而有城垣以爲軍事據點可以掩護野戰軍之集中可以使野戰軍動作容易可以防遏敵之侵入若國內防禦線而有城垣以爲軍事之發進基地則可以爲野戰軍之運動軸或支撐點容易本軍之運動阻碍敵軍之行進若第三線乃至第數線而有城垣支撐則可利用爲最後防禦前歲豫西戰役各村落均如城垣構成五百米一座千米一座二三千米四五千米一座大有設堡陣之勢中央軍攻之耗損極大去年閩馮隴海戰線綿亘數百里其陣地支撐點全賴村寨土壘與各處既設城垣構築既不需要多時陣地又層出不盡以故中央軍雖節節勝利爲期亦累月經年再我國固有城垣前已略

計不下二千餘座矣若卽以大城爲大要塞小城爲小要塞圍寨爲阻止
堡復將關於國防及戰略要地城池編爲要塞地帶於各城之間構築相
當工事及堡壘採用最新器材卽成爲良好堅固之障地其強韌力若準
半永久築城之興登堡線計算何止支持萬年之久由此觀之中國之城
垣實不啻國防上重要之無數軍事據點彼擊此援互相呼應無論斜編
倒置均可連爲據點式之無數防禦線此城垣之爲軍事上之據點可以
保留者五也夫成立國防非朝夕事構築堅寨需費孔多年來國庫空虛
凡百待舉陸海江防各要塞勞難儘先設備萬一邊疆告警舍依據城池
與現有要塞相互策應別無禦敵善法此應時勢之推移城垣之可以保
留者六也猶有進者現在大患雖除小醜未盡而國家幅員遼闊一地有
警軍隊倉卒不能馳應當地人民舍嬰城固守堅待援軍外別無他法倘
長沙城垣不拆湘民自可憑藉抵抗以待救援何至遭此浩劫兼旬流血

此其爲咎自在拆城遭者南昌迫於匪共又在舊城地址建築新圍勞民傷財莫可勝計如謂從前之拆毀爲是則現今之修築爲非出爾反爾可慨孰甚復考吾國近年內戰城居之民受害尙淺鄉居之民受害實深涿州西安武昌三城之民固不幸其餘城居之民能安居樂業者實居多數此又不得不謂爲係受城垣之賜由此可見現有城垣縱不從事修改其於對內防禦仍有相當效力此國家初定城垣之可以保留者七也總之城垣爲要塞基礎要塞爲國防之一部欲求鞏固國防決不能離開要塞而保持要塞之強韌必有待於堅城因果相生唇齒相依任缺其一不可幸存然則要塞究應如何配置乎各國要塞之配置皆因種種關係無一定之方程而可以設置要塞之地點總不外乎五個原則一。設於國境附近關繫戰略要點以容易我軍之作戰或制限敵之運動如凡爾登梅資之類是一。設於海岸要點卽軍港及重要之商港使艦隊作戰有利

同時掩護重要資源或防遏敵之侵入如我國之吳淞日本之長崎東京灣之類是三。設於大河之渡口及海峽山地之道路以確實保有隘路使本軍之運動自由或阻碍敵軍之侵入如中國之鎮江德之萊因河畔日本之下關等是四。設於一國之中心首府或大市鎮以始終保有其中樞機能或掩護重要國資如我國之江甯法國之巴黎是五。設於島嶼及遠隔之領地以確保其領有權如日本之澎湖島美之馬尼拉英之新拉坡之類是我國居亞洲之中心陸地則西北與赤俄之西伯利亞及中亞細亞毗連西南與英屬印度緬甸法屬安南毗連東與日本朝鮮毗連其地帶長凡十數萬里海岸則自遼甯安東之大東溝至廣州欽州之中興綿亘一萬二千里武事不備國防廢弛藩籬盡撤門戶洞開以積弱多難之國處虎狼環視之中應如何急起直追修我邊疆乃拆城議起一唱百和瞻望前途憂懼不勝職職司要塞難安緘默良以爲吾國邊疆如

粵·桂·滇·黔·康·藏·青海·新疆·東三省·內外蒙古·及沿海沿江各省區之城垣關係陸海江防適當戰略要點者均宜一律保留以形成犄角之勢而杜孤立之虞尤以長江爲敵所覬覦之要道首都爲政治之中心其附近數百里內之城垣更宜悉數保留並於平時精密規劃編配築城地域以爲鞏固國防基礎擬請將中國現有城垣交付國防會議或交負責機關審議以定保留而固國防並請明令各省遵照奉行是否有當伏乞

鈞裁謹呈

國民政府主席蔣

甯鎮澄淞四路要塞司令楊杰

保留城垣意見書

上海图书馆藏书



A541 212 0012 9117B

十四



1607011